

«Սկի ի տեսութիւն սուրբ ուխտիս Սանահնիս, զոր շինեալ էր թագաւորն Աշոտ և Խոսրովանոյ՝ թագուհին՝ հայրն և մայրն իմ»<sup>1</sup>:

Իսկ Բարսեղ Կեսարացու ձեռագիրն ընդօրինակող Սիմեան կրօնաւորը իր հիշատակարանում գրում է.

«Սև անարժանս ի կրօնաւորաց, փցուն գրիշս Սիմեան, ի թուականութեանս հայոց ՆԻԱ (421), ի նորաշէն վանքս կոչեցեալ Սանահին, հրամանաւ հար իմոյ Յովհաննիսի, որ էր վանիցս շինութիւն ամբ 2 (6), զոր շինեաց բարեպաշտ թագուհին Խոսրովանոյ՝ ամուսինն Աշոտոյ հայոց շահնշահի, որդի Սմբատայ Բագրատունոյ հայոց թագաւորի, և յառաջին ամի հայրապետութեան հոգևոր հաւրն հանուրց տեառն Խաչկայ արժանաւոր վերագիրտողի»<sup>2</sup>:

Այս փաստաթղթերի հիման վրա եզրակացնում ենք, որ Սանահնի վանքը հիմնադրել են Աշոտ Ողորմածն ու նրա կին Խոսրովանու թագուհին: Սակայն, կառուցման հոգսը գլխավորապես ընկած է եղել Խոսրովանու զինուորի վրա, որ գործել է իր և իր ամուսնու անունից: Այդ է պատճառը, որ իբրև վանքի հիմնադիր հաճախ հիշատակել են միայն թագուհու անունն առանց Աշոտի, և այդ ոչ միայն ուշ ժամանակներում, այլ նաև վանքի հիմնադրման առաջին իսկ տարիներին գրված վերոհիշյալ հիշատակարանում:

Մեզ համար մեծ կարևորություն ունեն հիշատակարանում մեջ բերված թվական տվյալները: Այդտեղ նշված է, որ հայոց ՆԻԱ (421 + 551 = 972) թվականը վանքի շինության վեցերորդ տարին է, ուրեմն վանքը կառուցվել է 972 - 6 = 966 կամ հայոց ՆԺԵ (415) թվականին: Ճիշտ նույն թվականն է տալիս Սանահնի հիմնարկությունը նշող մատենագիրներից հնագույնը՝ Սամուել Անեցին: Մնացած մատենագիրները բոլորն էլ Սանահնի հիմնադրման թվականը վերցրել են Սամուել Անեցուց, բայց իրենք կամ իրենց հետագայի արտագրողներն

անուշադրության պատճառով աղավաղել են, որի հետևանքով Ստեփանոս Օրբելյանի ժամանակագրության մեջ ՆԺԵ-ն դարձել է ՆԺԷ և ստացվել է մեր 968 թվականը: «Քոթովի» մի տեղում միավորի Ծ թվականը մոռացմամբ, շարտագրելու պատճառով Սանահնի հիմնարկությունը վերագրվել է հայոց ՆԺ (410) կամ մեր 961 թվականին: Ուրեմն ճիշտը պետք է համարել հայոց ՆԺԵ (415 + 551 = 966) թվականը:

Հետագայում աղավաղվել է նաև Սամուել Անեցու այն վկայությունը, թե Սանահինը 10 տարի առաջ է շինվել Հաղբատից: Ստեփանոս Օրբելյանի ժամանակագրության մեջ և մի քանի այլ տեղերում հակառակն է գրված, որ Հաղբատը 10 տարով առաջ է շինվել, քան Սանահինը: Այդ սխալն էլ դարձյալ արտագրողների անուշադրության հետևանքով է առաջ եկել<sup>3</sup>: Այս բոլորից եզրակացնում ենք, որ թեև Սանահնում Աբասի թագավորության ժամանակ է կառուցված եղել Աստվածածին եկեղեցին Բյուզանդիայից հալածված հոգևորականների ձեռքով, բայց ժամանակակիցների կողմից դա դեռևս վանքի հիմնադրությունը չի համարվել: Վանքի հիմնադրությունը, այսինքն Սանահնի գլխավոր եկեղեցու շինությունը, միաբանության հաստատումը և կալվածքների հատկացումը տեղի են ունեցել 966 թ. Խոսրովանու թագուհու և Աշոտ Ողորմածի ջանքերով, որտեղ թագուհին շատ ավելի գործուն գեր է կատարել:

Աշոտ Ողորմածի կողմից վանքին կալվածքներ հատկացնելու մասին տեղեկություններ ունենք Սմբատ Տիեզերակալի նույն հրովարտակի մեջ, որտեղ նա գրում է, որ ծնողները՝ Աշոտն ու Խոսրովանուշը, Սանահնի վանքը հարստացրել էին «յոլով Գեղորէիւք և հայրենօք, սարով և ձորով» («Քոթով», էջ 49): Իսկ ինքը՝ Սմբատը, 979 թվականին այցելության գալով Սանահն և այդ վանքը դարձնելով եպիսկոպոսական աթոռանիստ վայր, ընդարձակ վիճակ է շնորհել նրան:

<sup>1</sup> «Քոթով», էջ 47:

<sup>2</sup> Նույն տեղում, էջ 37-38:

<sup>3</sup> Տեղում ժողովրդական ստուգաբանությամբ Սանահին բառը բացատրում են՝ Սա հին է, քան Ես, այսինքն սա՝ Սանահնի վանքը՝ հին է, քան Ես՝ Հաղբատի վանքը: